

## Téerëe débpi bíní Peer ra Kúnsëe

Yee daa unna débpi bíní Peer ra. Di bíní wë kerceenni dékú ginni iippi non Aasi. Kerceenna bíní rí yee ra húmú moklu moklo di yee gémú wë Yéesú-Kiristaa Yíkëe në rë (3.14-17). Peer bíní wë unni yee woni wa bití wa ham ngémë híin, wa múñ coono fa daß wa ra, nda wa bok ndamee ke dí fi Yéesú na ac fayú ra (5.10). Di wonte wa dee wafti man pesi wa bee henluy wa bëewí nënih bëewí Koope leegi, wa nonute heeda tansu ra (2.9-10 ; 4.2-3).

Di wonte wa :

- yii lenke mújë waayid yen Koope ra (1.8-12),
- yii lenke pesad kerceen filib bëewë nënih bëewí Koope ra (2.11-17),
- yii lenke coono fa ñee Kiristaa ra (2.21-25),
- yii lenke di wafti pesuun yaal a belebi (3.1-7),
- yii lenke ñaŋi Kiristaa kúl kë (3.18-22),
- yii lenke lof pesad (4.1-6),
- a yii lenke di wafti pesaa ow a moroomi (4.7-11).

Bëyi fi ñaŋi téerii bee bëeb ay ot bití balaa tígë teem ngém ow ra olu, bëe' ay ñee misik. Di ñee misik dí ham híin nú lúsëenë rëe nék, dí ii rii réecciyëh.

### Wodoha

<sup>1</sup> Koy-yaayyi yeh, ðon fi bëewë Koope tanis wa ra, ðon fi doha-ndéemmë tasaaru ginna na

wonuu Ponto, Galasi, Kapados, Aasi a Bítíní rë, so' mi Peer apootari Yéésú-Kiristaa, daa mi na wodoh ron. <sup>2</sup> Koo Boffa daa tanis don ti di húmú maaña' ri ri faha' nen. Ruuhi tahte don henute bëewí, nda don ñee yee won Yéésú-Kiristaa ra ndín, ñif mi bukut don.

Koope hëpë rën mal, on don jaamma !

### *Mújë waayid yen Koope ra*

<sup>3</sup> Yen sím Koope, dī fi boffi Yéésú-Kiristaa Yíkíi yen ! Di naa'i keeñi, dī onte yen pes has bee källë' rí Yéésú búudé rë. Daaha, yen lahute yaakaari mínéh dúm, <sup>4</sup> yen na sehaaluu iña yefid Koope bëewí rë. Daa wa iña mínéh yah ra, yee na sísíbééh rë, yee hena' has faraaah ra. Koope yefidte ron wa ín sun. <sup>5</sup> Di ñeya' gémë gémú ron ra, dī na níid don a doolii nda don múc, te yii baa ay yúhúu yiin nay dúmé pesa ra.

<sup>6</sup> Iña yefid don Yíkëe yaa ra daa tah keeññon sos. Tígë homuu don bee ra kep, wuti coono fi mín dīi man béeb tah don ñee mok yutuud daa sah, keeññon sos. <sup>7</sup> Úrís sah na yah, ndaa balaa ow yúh biti dī kah-kah, dī ay ñee kii. Ti daaha nen, ngémën luka' ri úrís lah solo níi, balaa ow yúh biti dī kah-kah, don ay ñee misik. Hen daa raa, yiin nay nimile Yéésú-Kiristaa ra, don ay yeeliyoh kañ, ndam a bëyid. <sup>8</sup> Don fahuute ri te don oluy ri, don gémuté dīi na te don oluy ri doom. Yii baa daa tah don lah sosi keeñi gaani ow yéeh daa teem, <sup>9</sup> ndah don homute liili yee na saamu don ngémën dë : daa ri mújí rën.

<sup>10</sup> Merees, yonente ya húmú saamute yúhí yii lenjke mújí baa níi saam, te wa húmú léhínuté

bëewë mala nay ron one Koope ra. <sup>11</sup> Ruuhi Kiristaa húmú waa na, teeŋpe wa biti dī fi Kiristaa ay ñee coono, te ri lah ndam filoon fi baaha. Yii baa daa tah wa fi yonente ya saam níi saam yúhí wahtaa a dëe nay lahee iñyaa ra. <sup>12</sup> Koope teeŋpe yonente ya biti iña na wonu wa ra húmú yullay wa fi yaaha na, wa yulid' don na. Waariyoh yi Uni Neba komute ron wonni yaa leegi, te wa wonuu ri doolii Ruuh-Peseñ fa kola' sun-Koo ra. Malaaka ya sah fahuute yúhí wë níi faha'.

### *Koope dëekë' lan*

<sup>13</sup> Don lahute mali na seh ron sun-Koo yiin nay nimile Yéesú-Kiristaa raa kay, kon kélii affon don yeel, don tík yaakaaron béeb në. <sup>14</sup> Ñéyí yee naha' Koope ra, ti di na ñeya' koy yee nah ri boffi ra, don yeris iña húmú neba' ron merees na húmú yíih rën rë. <sup>15</sup> Yii pañ don béeb lah lëdí në ti di lada' Koope fa dëek dën dë nen, <sup>16</sup> ndah Koope won filiŋ Téerëe tih : « *Héní bëewí ladute, ndah so' mi lante.* »☆

<sup>17</sup> Bee don homute dañ da, don hom wonuu Koope Baap te daa ri na aattiya' ow fi ow béeb di iña pañ dī ra, te ri na lúukíréeh ow. Kon yee talluu ron pesa feey fa don haneel na bee ra, pesadon teeŋaa neeha neehu ron ri ra. <sup>18</sup> Don yúhruté affon dëe tosa' ri ron pesada lahay njiriñ koruu ron caaccon da maan ? Di tosaay ron a yii ay yahe yaho ti tiinj héliis mbée úris nen. <sup>19</sup> Èe-èe' ! Don sëmlúu a ñif mi cëllúuy a dara, ñif mi Kiristaa fa lahay dara yii wonun sun fi ti har fi

lahay síkkë nen ra. <sup>20</sup> Koope daa tanis ri, tíkké rí yii baaha balaa ri sak ëldúnë, te ri cépídté rí feey fa nda bëewë yúh rí jamanu ya millë' yee ra, ndah don. <sup>21</sup> Don ñee'uu dñi na don gémúté Koope fa kélícf dí búudé, onte ri ndam ra. Ngémën a yaakaaron, don tíkúu wë Koope na daaha.

<sup>22</sup> Don bukutuute ndah don ñéerúuté a kaaf ka. Yii baa daa tah don faha' koy-yaayyon filíbf ngémë faha' kah-kah. Kon, fëhëntíi hanndal kon níi fahanta' di keeññon béeb. <sup>23</sup> Yúhí biti unni Koope tahte don límëetúté. Ow neh daa límëet dën, ndah ow man tal gañcahi ay húlé húlë nen. Unni Koope nék, man tal gañcahi ii húl nen. Di ee pes da te ay home na faraah. <sup>24</sup> Ndah bíníyúté Téerëe bitih :

« *Ow béeb man gaawa nen,  
ndami man capussi gaaw fa meeyya nen :  
gaawa súhë' súhëe,  
capus yooka' yookoo.*

<sup>25</sup> *Unni Yíkëe nék ay home na faraah.* »☆

Te unni yaa daa Uni Neba húmú waariyu ron ra.

## 2

<sup>1</sup> Hém unni Koope tahte don límëetúté rëe kay, kon yii hente bos béeb héguí rí, don hegoh fel, pañ yii bokaay a yee na wonu ron ra, iñaan a won yin bos sun ow. <sup>2</sup> Di na sesa' baaker babi miis mi yaafi daa kah-kah fa ra, sésíi síkírëhí unni Koope daaha, ndah daa wa kah-kah fa. Don pesa' na raa, don ay ood te don ay

múc. <sup>3</sup> Nagajek, bíníyúté Téerëe bitih : « *Don d'íkísúuté Yíkëe, don olute dee neba' ri ra !* »✧  
Don pesuu yii baa neh a ?

*Tígë yípëh faam fa ra a faam fa*

<sup>4</sup> Èyí Yéésú-Yíkëe në, dī fa daa la'a na pes habuu bēewē bitī lahay njiriñ, ndaa daa ri bee Koope tanis dī otte bitī dī la'i lahte njiriñ ra.  
<sup>5</sup> Don fi yaa bal nēnī tabahi faam fa nay déké Ruuh-Pesen ra ti la' yi na pesu nen. Hen daa raa, don ay hen goomali seeyoh yi jébélú Koope, don yed dī sarahi neba'te ri di nay ron rii nahee Ruuha, yi ay ñee'ee Yéésú-Kiristaa na. <sup>6</sup> Ndah bíníyúté Téerëe bitih :

« *Èlsú !  
Mee yíp la' Siyon ra,  
la'i nay habe faam fa,  
la'i daa mi tanis dī,  
la'i lahte njiriñ,  
bēyí fī gém dūi na,  
fī mēssí sopoh.* »✧

<sup>7</sup> Kon don fa gémú rē, bēyrí affon sun, ndaa yaha bēewē gémúy rē rēe, bíníyúté bitih :

« *La'a habuu tabahoh ya bitī lahay njiriñ ra,  
daa millē' ham lasa.* »✧

<sup>8</sup> Lahte tígí bíníyúté bitī bal :  
« *Di la'i na kabina',  
la'i gaani na kéendē'.* »✧

Don ot bēewí yaa kabinoh, bitī wa kaa'uute ñeyi unni Koope, te nagajek, Koope daa faha' ri daaha waa na.

✧ **2:3** 2.3 Saame Kañaa ya 34.9 ✧ **2:6** 2.6 Saame Isayii 28.16

✧ **2:7** 2.7 Saame Kañaa ya 118.22 ✧ **2:8** 2.8 Saame Isayii 8.14

<sup>9</sup> Ndaa d'on, d'on daa heeda tansu ra, seeyoh yi Buura, heeda jébelú Koope ra, bëewí Koope. Di tanis d'on nda d'on mín waare iní éemílè' yè paŋ dī ra, dī fa dëek d'en, d'úhídté rën ñúusè kúdté rën niiñee ke ri hen saw ra. <sup>10</sup> Don húmú bëewí neh merees, ndaa woteh d'on bëewí ; naa'i keeñ Koope d'on húmú békíh nè, ndaa dī tahídté ron dī leegi.

*Pesad kerceen filib bëewë nënìh bëewí Koope ra*

<sup>11</sup> Don fa faha' mi ní faha' ra, d'on fa nënìh bëy èldúnè fi bee d'on haneel kut waa na ra, mi d'af d'on bitì d'on moytoh faha'i pesi-neba na yuloh yahi nuffon ti mbèrí na faha' kéendí moroomi nen ra. <sup>12</sup> Lah pèsii wun leelii bëewë nënìh bëewí Koope ra ; d'on hena' ri daaha raa wuti wa tík d'on yin bos, won bitì d'on i pagoh bos raa sah, wa ay ot bitì d'on pagu yin wun, wa kañ Koope yiin nay ri waa feeñiyee ra.

<sup>13</sup> Af Yíkèe taha d'on on kélfè yè cér : maanam buur fa daa ílíf bëy gina béeb rè, <sup>14</sup> a gèernèerrè buur wol wa daani pagoh yi bossa a bëyí fí paŋ yin wun wa géré m rí rè. <sup>15</sup> Nagajek, Koope faha' bitì d'on pagun yin wun d'on téy búkkí bëewë yíih yin ra, yee na wènìh wonad ow ra. <sup>16</sup> Koope onte ron d'on lahuute affon. Kon lah pèsii pesi bëyí daa laha' afi. Di filib baaha béeb nék, baa banay tah d'on dap bos d'on na. Don súrgè Koope na, kon lah pèsii daaha. <sup>17</sup> Lah èní bëewë béeb cér, d'on faha' koy-yaayyon filib ngémè, d'on neeh Koope, d'on on buuri gina cér.

*Coono fa ñee Kiristaa ra*

18 Don fi súrgë yë, lah ñéyí woni bëewë në légéyíruu ron ra, don on wa cér. Wa wun keñ te wa baah, wa sohoor béeb, lah ëní wë cér. 19 Ndée nagajek, don múñ súfúñ fí waray don koon ndah Koope raa, baa yin wun. 20 Don tooñ ní don labaa don múñ dí rëe nék, don sehu laasi bih na ? Ndaa hena biti don pagun yin wun don labaa don múñ dí rëe, baa yii wunte illí Koope. 21 Koope dëekë' dën baaha, ndah Kiristaa ñeete coono af don, nda don yíid yee pañ ri baa ra, don ñee kotti. 22 Di mësëy bakaad, fel mësëy d'uh búgë. ✧ 23 Soluu ri bín fë rë, dí yillëey ; mokluu ri ra, dí gapaay yillëh. Di yerisse béeb ya' Koope fa aattiya' i júbpé rë. 24 Homa' ri sun fi kurwaha\* ra, dí a faanañ fí séfëhté bakaadfi yen, nda yen bísë' a bakaad yen pes pesi júbpé. Gaañ-gaañni Kiristaa daa pay yen. 25 Don húmú madu harri múuyú múuyë nen, ndaa don nimilirute níiréhée ké ron na tooppitoh ron ra.

### 3

#### *Di wafti pesuun beleb a yaali*

1 Don fi belebba bal, ëní yaallon cér ! Hen daa wa ot don pagee ri daaha raa, wuti deef wa gé múy unni Koope merees raa, yii baa ay tah wa ay gé m te don ii waa won dara : 2 wa ot tilédën lan a dee koruu ron níi koroh raa rek, wocce ! 3 Ngënë mëkí wunaaloh don múukée garan, don pokee takkaayyi úrissën, don bekee

---

✧ **2:22** 2.22 Saame Isayii 53.9      \* **2:24** 2.24 kurwah :Di gerek, bíníyú deh : kilik. Téerëe won tih : bëyí fí yéjké biti na hawu ri húl rë keru sun kilik, bëyí baa alkohte. Saame Nérsí Kootaa 21.22-23.

búubbí piisë kofeelte. <sup>4</sup> Wunon kay homa filiḅ keeññon, ðon teey ðon sos. Wuni baa homa' na faraah. Baa daa yee lah solo íllí Koope ra. <sup>5</sup> Belebba húmú gémú filoon tíkuté yaakaari wa ya' Koope ra, húmú teebuu wuni wa ðaaha. Wa húmú onute yaalli wa cér, <sup>6</sup> ti di húmú ona' Saara Abraham cér, na ðeekë' rí nijaay ra nen. Don ay hen koyyi Saara biti ðon page yin wun te ðon néehíh nè dara.

<sup>7</sup> Don fi yaalla nék, lah kúrí belebbon ðon homa' wun, ðon yúh biti ðoni wa maduy. Ēní wë cér, ndah pesa na ðúméh nay ron one Koope ra, waḁte wa bal. Héní rí ðaaha nda Koope banti kaa' ðañon.

### *Ow nebpi paga wun*

<sup>8</sup> Kon sëyíi nuf yínë, ðon bok keeñ ; fëhëntíi filiḅ fon ti i koy-yaay nen ðon naa'anta' keeñ, ðon cépíḁ affon fíi moroommon. <sup>9</sup> Bëyí paḅ ðon yin bos mbée sol ron, ngënë yíllí. Don kay, lah ðëgírí rí biti Koope barkel ri, ndah Koope ðeekë' rën baaha. Hen ðaa raa, Koope barkel ron. <sup>10</sup> Ndée bíníyúté Téerëe bitih :

« *Bëyí fí faha' lah keeñi sosse,  
lah jaamma pesi,  
waḁtee moytoḅ won bos,  
fel banti ðúh búgë.*

<sup>11</sup> *Bëyí baa waḁtee hegoḅ bos.  
Di waḁti paga yin wun,  
waḁti ðékëe saam jaamma.*

<sup>12</sup> *Íllí Yíkëe yípëḅ sun fi bëewë júbú rë,  
ḁí kúníssé nufi na síkírëḅ ðañḅi wa ;*



*Yíkëe bota' bëewë na pagu bos da botoo.* »☆

<sup>13</sup> Daa nay ron page yin bos biti don saamuun paŋ wun kep ? <sup>14</sup> Wuti don ñee mok koon ndah biti don pagu yii júbpé rëe sah, don ay lah sos-keeñ. Ngënë néehí bëewí kayya, ngënë sídíi yin. <sup>15</sup> Don kay, békí affon biti kep Kiristaa daa Yíkëen. Cëgíi faraah don mín lof bëyí meel don yee tah don tík yaakaaron Yíkëe në rë. <sup>16</sup> Don yahti rii lof raa nék, lah pëgíi rí a teey, don on dī cér. Lah sëyíi nufi lante, nda bëewë na yahu tii yon af pesadi wunon Kiristaa na ra sopoh wonni wa. <sup>17</sup> Ow mokluun paŋ yin wun, te deefa Koope fahaa ri daaha raa, daa gén biti dī mokluun paŋ yin bos.

### *Baŋi Kiristaa kúl kë*

<sup>18</sup> Di fi Kiristaa, af bakaadfi yen tahte dī ñeete mok, te mogi baa ri moka' waal yínë, teempe waali yíníi baaha faw ; dī fa júb dë tahte húl ndah yen fa júbúy rë nda ri kúdf yen Koope na. Faana daa hawu húl, ndaa Ruuh-Peseŋ këlídté rí, dī na pes. <sup>19</sup> Doolii Ruuhi baa nék daa tah dī pay waare coonaa ya húmú kasu ra. <sup>20</sup> Daa wa bëewë húmú ñéerúuy a Koope jamanaa na húmú yugusa' Nowe gaala ra, te deef dī fi Koope múñélté wë, na seh. Bëewë húmú múcú mulii mbënë më rë húmú caakuy, wa húmú ow peeye daa haalu gaala. <sup>21</sup> Baa daa maanam bëtsée ké yen woteh ; mulii bëtsí baa wonay biti hosse sísífb fë faanni yen dé', iti fi bëtsë daa ri biti yen

---

☆ **3:12** 3.12 Saame Kañaa ya 34.13-17

pokoh Koope na a nufi lante\*. Bëtsë múcël yen múcëlë ndah kolohi Yéésú-Kiristaa búudé, <sup>22</sup> dī fa saañ sun-Koo tookke hëbís Koope, hompe ya'i ñamaa fi ra. Malaaka ya, mbínéeffí lahu un a yii lahte doole sun béëb onute ri cér.

## 4

### *Lof pesad*

<sup>1</sup> Koy-yaayyi yeh, hém faan Kiristaa daa ñee coono raa, tēhí ñee coono ti Kiristaa nen ; ndah bëyí faana híssí ñee coono, woca'te a bakaad. <sup>2</sup> Kon tígë homuu d'on bee ra kep, yee talluu ron peson dā wafti hena yee faha' Koope ra ndaa fah pes-neb neh. <sup>3</sup> Pese ke ron filoon béëb, na húmú dékúu d'on pañ yii neba' bëewë nēnīh bëewí Koope ra doyte d'on na leegi : d'on húmú pesuu pagad bos a fah pes-neb, mani, mbumbaay ní d'on d'úmélúté mbumbaay. Don na yúulúu ala bal, pagadi sēpírē'í bah. <sup>4</sup> Woteh fee Koo bee nék, bëewë nēnīh bëewí Koope ra éemúté di yee wocuu ron a wa di pesadi bos misigi baa ra, wa na solu ron. <sup>5</sup> Ndaa wani Koope fa cañ aattiya'i bëewë na pesu a yee húlú rē ay naa teeya'. <sup>6</sup> Yii baa daa tah Uni Neba waariyu sah bëewë húlú rē. Wa aattiyuu iña pagu wa bee na húmú pesuu wa feey ra naam ti bëewë béëb nen, ndaa af Ruuha tahte wa pesuu ti di na pesa' Koope nen.

### *Di wafti pesaa ow a moroomi*

---

\* **3:21** 3.21 iti fi bëtsë daa ri biti yen pokoh Koope na a nufi lante :Lahte bëewí habuu ri d'eh : iti fi bëtsí baa daa ri biti yen d'añ Koope dī on yen nufi lante.

<sup>7</sup> Ëldúnë d'úmpé ní wocce. Kon téeyí d'on yeel, nda d'on mín dan Koope. <sup>8</sup> Yee lukki lah solo ra bééβ nék, daa ri biti d'on fahanta' hanndal kon di keeññon, ndah faha' ow daa na múur bakaaf caak. <sup>9</sup> Kúnsírëntii illí faammon, banti ñéerè' a capitoh. <sup>10</sup> Ow fi ow d'on na bééβ, habraa moroomi di yee on d'on Koope ra. Hen d'aaha raa, deef iñi bokuuy ya on d'on Koope ra bééβ, d'on kúrúte wë kúrí wunte. <sup>11</sup> Bëyí fí yúhté biti ay wone wono, beka woni baa waarii unni Koope ; bëyí ay habree ow, pagaa ri a mín-mínë déjéen dí Koope ra. Hen d'aaha raa, bëewë ñeya' Yéésú-Kiristaa na kañ Koope di iña bééβ, dí fa laha' ndam a doole dee ní kiri fi kiri ra ! Démíin !

### *Ow nebpi ñeya coono fi Kiristaa*

<sup>12</sup> Don fa faha' mi ní faha' ra, coono fi misiga homuu ron ra banay tah affon kúnèh ní d'on won biti yii baa waray d'on kat. <sup>13</sup> Keeññon kay wafti sosa soso biti d'on bok a Kiristaa coono. Hen daa raa, yiin nay rii teebe bëewë bééβ ndami ra, keeññon sos ní sos. <sup>14</sup> Af Kiristaa tah d'on solu raa, d'on lahute sos-keeñ ndah Ruuhi Koope, dí fi Ruuha lah ndam ra ee d'on na. <sup>15</sup> Coono fon banay ñeya' biti d'on hawun ow húl, mbée biti d'on lohun loho, d'on pagun yin bos, mbée d'on haalun yii waal fon íníh në. <sup>16</sup> Ndaa hena henu ron kerceen ra daa taha d'on hom coono raa, ngënë sèpíi në ; d'on warun naa kañ Koope kaño di yee nonuu ron Kiristaa na ra.

<sup>17</sup> Wahtaa nay dale aattiya'a ra lahte, te ay débúu yen fi bëy Faam Koope na. Daluun yen na raa nék, lah bëewë yéjké biti gémúy Uni

Nebi Koope raa, ay made d'ih waa na ? <sup>18</sup> Ndah b'iniyute Teere bitih :

« *Hém mújí bēe' júb dē*  
*daa misik raa,*  
*lah bakaaroha na,*  
*dī fa kaañ Koope ra raa,*  
*ay made d'ih ? »*✧

<sup>19</sup> Kon, bēewē Koope daa faha' biti wa ñee coono ra, pagun wun rek saye, wa tik pesi wa ya' Koope fa daa sak wa ra, dī fa yii won dī béeb dī pañ ri ra.

## 5

### *Njüttí jaŋaa*

<sup>1</sup> Bēewē homu filiḅ fon te wa i njūt jañi ra, so' mi won don na, so' fa njūt jañi ti don nen ra. So' mi tikké illí sē' coono fi Kiristaa ngēey te may non ndamee ke ri nay teebuu ra. So' mi won don tee : <sup>2</sup> tēppítíi yuba dēñéen d'ēn Koope ra. Yéelí nē, don ban d'ii paga' biti don túuyú rí túuyē, pégí rí don núhē' rí keeññon, dee faha' ri Koope ra. Ngēnē pégíi rí biti don ay naa saame alal, pégíi rí a sawoor. <sup>3</sup> Ngēnē mēklí bēewē dēñéenu don da. Don kay, wa waḁti yíirún don na ! <sup>4</sup> Hen ḁaa raa, yiin nay nimile kélfíi níirēh yē rē, don beku baane-ndam, bi ay hene has faraah.

### *Ow nebpi cépirē afi cépirē, ham ngémē*

<sup>5</sup> Don fi tunka nék, lah ení bēewē bahayu ron ra cér. Don béeb nék, cépirí affon hanndal kon, ndah b'iniyute Teere bitih : « *Koope ñéerēey a bēewē na gaan-gaanluu ra, dī ona' bēewē cépirú*

✧ **4:18** 4.18 Saame Léeh yē 11.31

*affi wa ra mal.* »☆ 6 Kon, cépírí affon fíi Koope fi Sërndëñë, nda wahtaa lah raa, dī béyíd don. 7 Héli ñña na sídúu don dā bééβ ya'i, daa ri na tooppitoh don.

8 Téeyí don yeel ! Seytaane, kaa'ohon ee yídeelëh rë, man gaynde fi na híigëh, na boorsoh bëyí ñnama ri nen. 9 Hëbí ngémë híin don haa' a dī fi Seytaane, don yúh bití koy-yaayyon filíβ ngémë homu feey fa ra bééβ ñeyuu coono dāaha. 10 Don lísúu hom coono kaah, ndaa Koope fa na ona' bééβ rë dëekké don don haal ndamee ke ri na dúmëh rë, af bití don nonu Yéésú-Kiristaa na. Tasse yutuud dī ay ron baatti yugus, habra' ron, on don doole, tík don don caga' a kotti híinté. 11 Koope laha doole dee níi kiri fi kirih ! Démíin !

### *Takoha*

12 Silaas\* fa haba' mi koy-yaafi pokohte Kiristaa na ra daa habra' so' bíníi don koy unni yeh. Bedda'i ron a woni ron bití mali Koope kaah te don ham na híin, daa tah mi bíní ron unni yeh.

13 Bëy Babilonna† dee nonu jaŋaa ra, yee Koope tanis wa tí di tansa' ri ron nen ra, a Marka fa haba' mi koy kah-kah soo na ra na woduu ron.

14 Wëdëntíi hanndal kon níi wodanta'‡.

Koope ona ron fa nonu Kiristaa na ra bééβ jaamma !

---

☆ 5:5 5.5 Saame Léeh yë 3.34 \* 5:12 5.12 Silaas :Di gerek bíníyú deh : Silwee. Daa ri tii yíníi Silaas. † 5:13 5.13 Babilon :Rom daa na léehúu dāh. ‡ 5:14 5.14 Di baahi bëewí yaaha, wa yahti wodoh bëewë mboko yi wa mbée bëewë meeru wa raa, wa fëenúu wë fëenëe.

## **Séréel Ndút: Unni Koope**

### **Ndut: Séréel Ndút: Unni Koope (New Testament+)**

copyright © 2020 Wycliffe Bible Translators, Inc.

Language: (Ndut)

Contributor: Wycliffe Bible Translators, Inc.

All rights reserved.

2020-11-20

---

PDF generated using Haiola and XeLaTeX on 21 Feb 2024 from source files dated 29 Jan 2022

a3a1238b-9393-5875-a4c5-1d3f38537bfe